

दिनांक 08.10.2023

समय: 18.50 बजे

आकाशवाणी जयपुर-अजमेर

प्रादेशिक समाचार

- राष्ट्रपति द्रौपदी मुर्मू काले नुवी दिल्ली मांय न्याय संगत अर बाधावां सहन मांय सक्षम कृषि खाद्य प्रणाली माथे अन्तर्राष्ट्रीय अनुसंधान सम्मेलन रो करेला उद्घाटन ।
- भारतीय वायु सेना मना री है आज आपरो थापना दिवस – प्रधानमंत्री नरेन्द्र मोदी कह्यो के देश ने आपरा वायु सेना कर्मियां रा बल, समर्पण अर निष्ठा माथे मान
- मुख्यमंत्री अशोक गहलोत केई महतारुं प्रस्तावां ने दी मंजूरी— बालिकावां अर महिलावां ने रोडवेज रा मासिक पास बणावण माथे अबे किराया मांय मिलेला 90 फीसदी छूट।

और

- विश्वकप क्रिकेट मुकाबलां मांय ऑस्ट्रेलियां री टीम भारत ने दियो 200 रन रो लगस।

राष्ट्रपति द्रौपदी मुर्मू काले न्याय संगत अर बाधावां सहण करण मांय सक्षम कृषि खाद्य प्रणाली माथे अन्तर्राष्ट्रीय अनुसंधान सम्मेलन रो नुवी दिल्ली मांय उद्घाटन करेला। ओ सम्मेलन 12 अक्टूबर ताई चालेला। भारतीय कृषि अनुसंधान परिषद अर अन्तर्राष्ट्रीय कृषि अनुसंधान माथे परामर्श समूह जैंडर प्लेटफॉर्म ई सम्मेलन रो आयोजन कर रिया है। भारतीय कृषि अनुसंधान परिषद रा महानिदेशक डॉक्टर हिमांशु पाठक बतायो के ओ सम्मेलन अजे ई व्ह्या जी-20 शिखर सम्मेलन ने देखता घणो महतारु है।

000

भारतीय वायु सेना आज आपरो थापना दिवस मना री है। प्रधानमंत्री नरेन्द्र मोदी वायु सेना रा थापना दिवस माथे एक ट्वीट संदेश मांय कह्यो क देश ने आपणा वायु सेना कर्मियां रा बल, समर्पण अर निष्ठा माथे मान है। वणा कह्यो क वायुसेना री सेवा अर बलिदान रे कारण ई आपा रो हवाई-क्षेत्र सुरक्षित है।

.....
थापना दीवस रे मौके खास जलसो उत्तरप्रदेश रा प्रयागराज मांय व्हीयो। अठे बमरौली वायुसेना केंद्र मांय शानदार परेड व्ही। वायुसेना प्रमुख एयर चीफ मार्शल वी.आर. चौधरी परेड रो निरीक्षण कर्यो। ई मौके फौज रा प्रमुख जनरल अनिल चौहान अर मध्य हवाई कमान रा जनरल ऑफिसर इन कमांड एयर मार्शल आर.जी.के. कपूर ई

मौजूद रियां। वायुसेना प्रमुख परेड मांय वायुसेना रा नुवा झंड़ा रो ई अनावरण कर्यो। अबे पुराणा झंड़ा ने वायुसेना संग्रहालय मांय दर्शायो जायेला। ई साल वायुसेना दिवस माथे परेड री अगवाई पैली बार महिला अहलकार, ग्रुप कैप्टन शालिजा धामी कर्यो। पैली बार, महिला सैन्य कर्मियां री टुकड़ी परेड मांय भेळी व्ही जिण मांय अग्निवीर वायु महिलावां ई भेळी री। राष्ट्रपति द्रौपदी मुर्मू, राज्यपाल कलराज मिश्र अर मुख्यमंत्री अशोक गहलोत वायु योद्धावां अर वां रा पिरवारा ने बधाई दी है।

000

केन्द्रीय माध्यमिक शिक्षा बोर्ड सीबीएसई शैक्षणिक साल 2023-24 सारू कलास नवीं अर ग्यारहवीं रा पढेसरा री ऑनलाइन पंजीयन री तारीख 25 अक्टूबर तांई बधा दी है। बोर्ड रा अजमेर दफ्तर ऊं मिळी जाणकारी मुजब स्कूल प्रबंधन बोर्ड री अधिकृत वेबसाइट माथे मौजूद परीक्षा संगम लिंक माथे पढेसर आपणो नाम मढा सके हैं। बोर्ड स्कूलां ने सावचेत कर्या है के पढेसर रा कोर्स ने भरती बगत सावधानी राखे,क्यों के नाम मंडावण रे पाछे कोर्स मांय सुधार नी कर्यो जा सकेला।

000

कोटा जिला कलेक्टर अर चुणाव अहलकार आवता विधानसभा चुणावां री दीठ ऊं आज एक हुकम काडता निर्देश दिया है क कोई ई मिनख किण ई ऐडा पैम्फलेट अर पोस्टर ने नी बणावेला अर नी छापेला, जिण रा खास पाना माथे उण छापण वाळां रो नाम अर पतो नी लिख्यो व्हे। जिला रा सगळा छापाखाना वाळा री बैठक लेवण रे पछे चुनव अहलकार कह्यो के आयोग रा अनुदेशां री किणी ई तरह नी मानण ने करडाई ऊं लियो जाएला अर वां माथे करडी कर्रवाई करी जाएला।

000

केद्रीय शिक्षा मंत्री आज जैपर मांय भाजपा पदाधिकारियां अर कार्य कर्तावां रे साथे संभाग बैठक करी। जैपर संभाग री बैठक मांय मांय केई महताऊं मुद्दा माथे चर्चा व्ही। बणा कह्यो के विधानसभा अर लोक सभा रा चुणाव सारू भाजपा रा कार्यकर्ता आत्मविश्वास रे साथे तियार है। बणा कह्यो के राजस्थान रा जन-जन री भावनावां ने फगत भाजपा ई पूरी कर सके है। बणा कह्यो के कार्यकर्तावां मांय प्रधानमंत्री नरेन्द्र मोदी री भरोसा मंद अगवाई, सेवा सुशासन अर लोक कल्याण माथे सब ने दृढ विश्वास है।

000

आज हिन्दी अर उर्दू रा सब ऊं लोकप्रिय उपन्यासकार अर कहाणीकार मुंशी प्रेमचन्द री पुण्यतिथि है। आपरा लेखन ऊं सत्ता अर समाज री कुरीतियां माथे चोट करण वाळा अर गरीब, मजूर रा दर्द री आवाज देवण वाळा प्रेमचन्द ने मुख्यमंत्री अशोक गहलोत श्रद्धाजंलि दी है। एक ट्वीट री मार्फत वणा कयो के 'उपन्यास सम्राट' प्रेमचंद गांवाई भारत री आत्मा ने कागज माथे सजीवत कर्या। वां रो लेखन जुगां तांई लोगां रा मानस री भावनावां ने झकझोरता रेहवेला।

.....

मुख्यमंत्री अशोक गहलोत आज राज्य मांय न्यारा न्यारा हलकां सारू केई महताऊं प्रस्तावां ने मंजूरी दी है। मुख्यमंत्री जोधपुर रा मण्डोर मांय मंगलेश्वर महादेव मिन्दर ट्रस्ट सारू 30 बिस्तर वाळा शहरी सामुदायिक स्वास्थ्य केन्द्र अर ट्रोमा सेंटर खोल्या जावण ने मंजूरी दी है। ई सारू 6 करोड़ सात लाख रिप्या रा बजट ने मंजूर करी ज्या है। सामुदायिक स्वास्थ्य केन्द्र सारू 22 अर ट्रोमा सेंटर सारू 16 नुवा ओहदा बणावण ने ई मंजूरी दीरीजी है। वठे ई राज्य री सगळी बालिकावां अर महिलावां ने रोडवेज रो मासिक पास बणावण माथे अबे किराया मांय 90 फीसदी री छूट मिलेला। मुख्यमंत्री अशोक गहलोत आज ई बारा मांय एक प्रस्तान ने मंजूरी दी है। आ छूट राजस्थान रोडवेज री साधारण अर एक्सप्रेस बसां मांय राज्य री सरहद मांय लागू व्हेला। पेला रोडवेज री बसां मांय महिलावां ने मासिक पास बणावण माथे किराया मांय 45 फीसदी री छूट दी जाए री ही। राज्य सरकार प्रदेश रा 11 संस्कृत स्कूलां रो दर्जी बधायो है। आं स्कूलां मांय ऊं 6 स्कूलां ने प्रवेशिका ऊं वरिष्ठ उपाध्याय थर, 3 स्कूलां ने उच्च प्राथमिक थर ऊं वरिष्ठ उपाध्याय अर 2 स्कूलां ने प्राथमिक ऊं उच्च प्राथमिक थर रा करी ज्या है। राजसमंद रा खमनौर मांय कस्तूरबा गांधी बालिका आवासीय स्कूल मांय हॉस्टल बणायो जाएला। मुख्यमंत्री हॉस्टल बणावण सारू 4 करोड़ 41 लाख रिप्या री रोकड मंजूरी दी है। ई हॉस्टल मांय कक्षा 9 ऊं 12वीं ताई री बालिकावां रह र पढ़ाई कर सकेला। वठे ई राज्य मांय लैब टेक्नीशियन अर रेडियोग्राफर ने अबे 22 सौ 50 रिप्या री ठोड सत्ताईस सौ पचास रिप्या महीना वर्दी भत्तो मिलेला।

000

सामाजिक न्याय अर अधिकारिता महकमां रा एक हुकम मुजब अबे प्रदेश मांय जाति रा आधार माथे सर्वेक्षण करायो जायेला। सर्वेक्षण मांय राज्य रा सगळा रहवासियां रा सामाजिक, माली हालात अर शिक्षा रा थर रा बारा मांय जाणकारी अर आंकडा भेळा करा जायेला। सरकार आं आंकडां रो खास अध्ययन करवा र न्यारा-न्यारा तबकां रा पिछडा पन री हालात मांय सुधार लावण सारू खास कल्याणकारी उपाय अर योजनावां लागू करेला। मुख्यमंत्री अशोक गहलोत एक ट्वीट री मार्फत कह्यो है के हर जरूरतमंद ताई वां रा हक रो फायदो पुगावण रा मकसद ऊं सरकार आपरा संसाधनां ऊं ओ सर्वेक्षण करावण रो फ़ैसलो लियो है जिण रा आंकडां माथे न्यारा-न्यारा तबका री जरूरत मुजब योजनावां बणाई जा सकेला।

महकमा रां शासन सचिव डॉ. समित शर्मा ई बारा मांय हुकम काढ्या है। ओ सर्वेक्षण आयोजना मेहकमा कानी ऊं नोडल मेहकमा रा रूप मांय करायो जायेला। साथे ई, सगळा जिला कलेक्टर सर्वेक्षण सारू नगर पालिका, नगर परिषद, नगर निगम, ग्राम अर पंचायत थर माथे सगळा मेहकमा रा अधीनस्थ कर्मचारियां री सेवां ली जा सकेला। ई सारू नोडल महकमो एक प्रश्नावली तियार करेला जिण ऊं हर मिनख री सामाजिक, माली अर शैक्षिक थर री सगळी जाणकारी मिल सकेला।

000

बीकानेर रो राष्ट्रीय ऊट अनुसंधान केन्द्र कैमल मिल्क ऊं नी फगत तरह-तरह रा ड्येरी उत्पाद बणा रीया है बल्कि दूध डेयरी अर पार्लर ऊं बरोबर आमद मांय बढवार कर रीयो

है। राष्ट्रीय ऊट अनुसंधान केन्द्र कानी ऊं बनाया जा रिया डेयरी उत्पादा माथे मारा बीकानेर खबरनवीस री खास रपट।

000

जयपुर ऊ असारवा जाय री रेल माथे आज डूंगरपुर रा बलवाड़ा टेशन ऊं आगे भाटा फेकण री घटना व्ही। इण ऊं रेल रा एक डब्बा रा कांच फुट गया। भाटा फेकण री ई घटना ऊं जात्रियां माय अफरा तफरी माच गयी, फेरू ही ई घटना मांय कोई जात्री रे चोटा नी आई है। उठिने रिया एक सडक हादसा मांय उदयपुर ऊं पिंडवाड़ा गोगुंदा मार्ग माथे एक तेल का टैंकर रे पलट जावण ऊं रास्ते चालती 100 ऊं बत्ती भेडा री मौका माथे ई मौत व्हे गयी अर दो मिनख घायल व्हे गया। टैंकर पलट जावण ऊं उण मांय भर्यो खावण रो तेल सडक माथे बहवण लाग्यो जिण ने समेटण सारू लोगा री भीड लाग गयी अर मार्ग रूकीज गयो। एक दूजा सडक हादसा मांय कोटा रा पोलाईकला गांव मांय एक मिनख री मौत व्हे गयी। हादसो उण बगत व्ह्यो जद बारां कानी ऊं आयरी तेज रफ्तार कार मोटरसाईकिल सवार रे टक्कर मार दी। एक दूजा हादसा मांय सिरोही जिला रा कालंद्री हलका मांय तळाव मांय डूब जावण ऊं एक टाबर री मौत व्हे गयी। पुलिस गोताखोरां री मदद ऊं शव ने निकाल ने पिरवारजना ने सुप दिया है।

000

विश्व कप क्रिकेट होड मांय आज भारत आपरो पैलो मैच ऑस्ट्रेलिया रे साथे खेल रीयो है। चेन्नई मांय व्हे रीया मुकाबला मांय ऑस्ट्रेलिया री टीम पैला बल्लेबाजी करता भारत ने जीतण सारू 200 रन रो लकस दियो है। ऑस्ट्रेलिया रा स्टीवन स्मिथ 46 रन बनाया। भारत रा गेंदबाजी चौखी गेंदबाजी करी। रविन्द्र जडेजा ने 28 रन देर 3 खिलाडियां ने आउट कर्या। लगस रो पाछो करता भारत री सरूआत घणी खराब री। ताजा समाचार मिलण तांई भारत री टीम रन बना लिया है और उण रा खिलाडी आउट व्हे गया है।

000

चीन रा हांगचोओ मांय व्ह्या एशियाई खेल आज पूरा व्हे गया। भारतीय एथलीट्स समापन जळसां मांय शिरकत करी। हॉकी टीम रा गोलकीपर पी. आर. श्रीजेश भारत रा ध्वजवाहक बण्या। 19 वां एशियाई खेलां मांय भारत 28 सोना रा, 38 चांदी रा अर 41 कांसी रा तमगा समेत कुल 107 तमगा जीत र चौथी ठौड़ माथे रियो। भारत साल 2018 मांय जकार्ता मांय बनाया आपणा ठावा प्रदर्शन ने 37 तमगा ऊं पाछे छोड़ दिया है।

000